

आकाशवाणी

पैहले खास-खास खबरां:-

1. प्रधानमंत्री नरेन्द्र मोदी होर अज्जै थमां 2 दिन दे उत्तर प्रदेश दे दौरै पर रौहडन। एह वाराणसी च 6 जहार 350 करोड़ रपे दी केंई परियोजनाएं दी शुरुआत करडन।
2. प्रधानमंत्री होर उत्तर प्रदेश- मध्य प्रदेश ते महाराष्ट्र गी जोड़ने आहली 2 नमीं अमृत भारत एक्सप्रेस रेल गड़्डियें दी शुरुआत करडन।
3. रक्षा मंत्री राजनाथ सिंह होर किर्गिस्तान दे विश्केक च शंघाई सहयोग संगठन SCO दे रक्षा मंत्रिणं दी बैठक च हिस्सा लैडन।
4. लद्दाख दे उपराज्यपाल विनय कुमार सक्सेना होरें केन्द्र शासित प्रदेश च 5 नमें जिलें कायम करने गी मंजूरी दिती जेदे कन्नै कुल जिले दी गिनतरी 7 होई गेई।
5. अमरीकी राष्ट्रपति डोनाल्ड ट्रम्प होरें होर्मुज जल डमरु मध्य गी खोलने दे ईरान दे नमें प्रस्ताव पर चर्चा करने आस्तै अपनी राष्ट्रीय सुरक्षा टीम कन्नै मलाटी कीती।
6. ते आई.पी.एल क्रिकेट च कल रातीं दिल्ली च खेड़्ठे गेदे इक तरफा मुकाबले च रॉयल चैलेन्जर्स बेंगलूरु नै दिल्ली कैपिटल्स गी 9 विकेटें कन्नै हराया।

<><><><><><>

PM-UP Visit

प्रधानमंत्री नरेन्द्र मोदी होर अज्जै सोआ उत्तर प्रदेश दे 2 दिने दी यात्रा पर जा करदे न। यात्रा दे पैहले गेड़ च प्रधानमंत्री अज्ज अपने संसदीय निर्वाचन क्षेत्र वाराणसी पुजडन। ओह वाराणसी च अज्ज संजा महिला सम्मेलन च च शामिल होडन ते तकरीबन 6 जहार 350 करोड़ रपे दी लागत कन्नै तयार केंई विकास परियोजनाएं दा

उदघाटन करडन ते कैङ्गयें दा नीह पत्थर रखडन। प्रधानमंत्री होर अज्ज संजा उत्तर प्रदेश- मध्य प्रदेश ते महाराष्ट्र गी जोड़ने आली 2 नमीं अमृत भारत एक्सप्रेस रेल गड़्डियें गी रवाना करोआडन। ओह वाराणसी पंडित दीनदयाल अपाध्याय Junction दी त्री ते चौथी रेलवे लाइन परियोजना दा नीह पत्थर बी रखडन। यात्रा दे दुए चरण च कल प्रधानमंत्री हरदोई जाडन ते गंगा एक्सप्रेस दा उदघाटन करडन।

<><><><><><>

PM –Sikkim Statehood

प्रधानमंत्री नरेन्द्र होर अज्ज गंगटोक दे पालजोर स्टेजियम च सिक्किम राज्य दे 50में स्थापना दिवस दे समापन समारोह च शामिल होडन। इस कार्यक्रम च सिक्किम दे राज्यपाल ओम प्रकाश माथुर- मुख्खमंत्री प्रेम सिंह तमांग गोलें- सिक्किम दे मंत्री ते कैङ्ग सांसद बी हिस्सा लैडन। प्रधानमंत्री होर 4 जहार करोड़ रपे शा मती लागत दी कैङ्ग विकास परियोजनाएं दा उदघाटन करडन ते नीह पत्थर रखडन। प्रधानमंत्री होर इस मौके पर लोकें दे किट्ठै गी सम्बोधित बी करडन। इनें परियोजनाएं च ढांचागत विकास- राबता- सेहत सेवा- शिक्षा- बिजली- शैहरी विकास ते राई-बाई सनें व्यापक क्षेत्र शामिल न। इंदा मकसद सिक्किम च पूरे-पराते विकास च तेजी आनना ऐ। सिक्किम सरकार प्रधानमंत्री मोदी हुंदी मौजूदगी च 15 सौ मते मकामी कलाकारें गी लेइयै इक बड़्डे सांस्कृतिक कार्यक्रम दा आयोजन करा रदी ऐ। इस कार्यक्रम दा विषय “एकता दे 1000 कदम” ऐ।

<><><><><><>

WB -Election

पच्छिम बंगाल च दुए गेड़ ते अखीरले गेड़ लेई प्रचार सम्पन्न होई गेआ ऐ। इस गेड़ तैहत मतदान कल यानि 29 अप्रैल गी होना ऐ। 142 विधानसभा सीटें पर मतदाताएं गी अपने पक्ख च करने लेई सारी राजनैतिक पार्टिएं जोर-शोर कन्नै प्रचार कीता। इस गेड़ च 3 करोड़ 21 लक्ख 73 ज्हार 837 मतदाता वोट पाने दे अपने अधिकार दा इस्तेमाल करडन। इंदे चा इक करोड़ 57 लक्ख 37 ज्हार 418 महिलां- इक करोड़ 64 लक्ख 35 ज्हार 627 मर्दे ते 792 Third Gender न। इस गेड़ च कुल इक ज्हार 448 मेदवार चुना मैदान च न- जिंदे चा 220 महिलां मेदवार न।

<><><><><><>

DM -SCO

रक्षामंत्री राजनाथ सिंह होर किर्गिस्तान च बिश्केक च शंघाई सहयोग संगठन SCO दे रक्षा मंत्रियें दी बैठक च हिस्सा लैडन। सोशल मीडिया दी पोस्ट च सिंह होरें आखेआ जे बैठक दौरान ओह दुनिया भरें च मौजूदा सुरक्षा चुनौतियें दे चलदे वैश्विक शांति प्रति भारत दी प्रतिबद्धता गी रेखांकित करडन। रक्षा मंत्री होरें आखेआ जे ओह आतंकवाद ते उग्रवाद गी दना बी नैई बरदाख्त करने आहले रुख पर बी जोर देगंन। सिंह होरें आखेआ जे ओह होरनें SCO सदस्य मुखें दे अपने जोड़ीदारें ते बिश्केक च भारतीय समुदाय कन्नै दपक्खी गल्लाबत लेई उत्सुक न।

<><><><><><>

MP- UCC

मध्य प्रदेश सरकार नै राज्य च सम्मान नागरिक संहिता UCC दी अमलावरी सरबन्धी व्यवहारिकता दी जांच करने आस्तै इक उच्च स्तरीय समीति कायम कीती ऐ। इस मामलें गी लेइयै कल इक आदेश जारी कीता गेआ ऐ। इस समीति दी अध्यक्षता सुप्रीम कोर्ट दे साबका न्यायधीश न्यायमूर्ति रंजना प्रसाद देसाई करडन। अपनी जिम्मेदारियें तैहत एह पैनल उत्तराखंड ते गुजरात जनेह राज्यें आसेआ अपनाएं गेदे मॉडल दी जांच करोग। तौआई मध्य प्रदेश दे समाजिक- सांस्कृतिक ते आर्थिक पैहलें गी बी ध्यानै च रखेआ जाहग। समीति गी मसौदा बिल सने 60 दिनें अंदर अपनी रिपोर्ट जमा करोआने लेई आखेआ गेआ ऐ।

<><><><><><>

Health Ministers-Heatwave

सेहत ते परोआर कल्याण मंत्रालय नै औंदे गर्मियें आहले मौसम च लू दी स्थिति गी दिक्खदे होई राज्यें ते केन्द्र शासित प्रदेशें थमां तयारियां करने दा आग्रह कीता ऐ। राज्यें ते केन्द्र शासित प्रदेशें दे मुख सचिवें गी लिखी दी चिट्ठी च सेहत ते परोआर कल्याण मंत्रालय दी सचिव पुण्या सलीला श्रीवास्तव होरें आखेआ जे मौजूद विभाग दी पेशगोई दे आधार पर अप्रैल थमां जून 2026 तगर पूर्वी- मध्य ते उत्तर पच्छमी भारत दे किश हिस्सें कन्नै दक्खन पूर्वी प्रायद्वीप च सामान्य थवां मती लू चलने दी संभावना ऐ। मंत्रालय नै राज्यें ते केन्द्र शासित प्रदेशें गी सारे सेहत केन्द्रें पर लू प्रबंधन आस्तै समर्पित इकाइयां कायम करने एम्बुलेंस सेवा दी तयारिएं सनें लोइचदे इंतजाम लेई निर्देश जारी कीते न।

<><><><><><>

Ladakh -New Districts

लद्दाख दे उपराज्यपाल विनय कुमार सक्सेना होरें केन्द्र शासत रदेश च 5 नमें जिले दे गठन गी मंजूरी देई दिती ऐ- जेहदे कन्नै जिलें दी कुल गिनतरी 7 होई गई ऐ। नमें जिले दे नां न- Nubra- Sham- चांगयांग- Zaskar ते द्रास। एहदे शा पैहले लद्दाख च छड़े 2 जिले- लेहे ते कारगिल हे। इसी इक ऐतिहासिक गैह करार दिंदे होई उपराज्यपाल होरें आखेआ जे एह फैसला खिते दे लोके गी लम्में चिरे सोआ चली आवा रदी मंग गी पूरा करदा ऐ।

<><><><><><>

Trump –Iran Hormuz

अमरीकी राष्ट्रपति डोनाल्ड ट्रम्प होरें होर्मुज जल डमरु मध्य गी खोलने दे ईरान दे नमें प्रस्ताव पर चर्चा करने आस्तै अपनी राष्ट्रीय सुरक्षा टीम कन्नै मलाटी कीती ऐ। व्हाईट हाऊस दी प्रवक्ता कैरोलिन लैविट होरें दस्सेया जे ट्रम्प होर ईरान दे नमें प्रस्ताव पर चर्चा करा रदे हे। उ’ने पत्रकारें गी दस्सेआ जे ट्रम्प तौले गै इस विशे पर गल्ल करडन। लैविट होरें आखेआ जे ईरान दे सरबन्ध च ट्रम्प हुंदियां शर्ता ईरान दे सामने साफ करी दितीयां गेइयां न। तोंआई होर्मुज जल डमरु मध्य दा खुलना अजें बी दुनिया आस्तै सब्बनें थवां बड्डी चिंता दा विशे ऐ- जेड़ा वैश्विक तेल आपूर्ति दे 5में हिस्से दे परिवहन आस्तै इक महत्वपूर्ण समुन्द्री रस्ता ऐ।

<><><><><><>

Iran- Strait of Hormuz

ईरान नै अपनी बंदरगाहें पर अमरीकी नाकाबंदी हटाने ते लड़ाई गी खत्म करने दे बदले च होर्मुज जल डमरु मध्य गी खोलने दा प्रस्ताव दिता ऐ। ईरान नै नमें प्रस्ताव च आखेआ ऐ जे ओदे परमाणु कार्यक्रम दे व्यापक मुद्दे पर चर्चा- मगरा आहले गेड़ च कीती जाहग। एह प्रस्ताव सेंट पीटर्स बर्ग च रुस दे राष्ट्रपति ब्लादिमीर पुतिन ते विदेशमंत्री सर्गेई लावारोव हुंदे कन्नै ईरान दे विदेश मंत्री अब्बास अराघची हुंदी गल्लाबत दौरान आया ऐ। अराघची होरें बैठक थमां पैहले आखेआ जे अमरीका अपने युद्ध उद्देश्यें गी पूरा करने च विफल रेया ऐ ते हून कमजोर स्थिति कन्नै गल्लबात दी कोशिश करा रदा ऐ। राष्ट्रपति पुतिन होरें ईरान -रुस सरबंधें गी इक रणनीतिक सांझेदारी दस्सेआ। पुतिन होरें आखेआ जे रुस- पच्छिम एशिया च स्थिरता बहाल करने लेई कम्म करोग।

<><><><><><>

UN-PGA Visit

संयुक्त राष्ट्र महासभा दे 80में सत्र दी अध्यक्ष एनालेना बेयर बॉक अज्ज नमीं दिल्ली च विदेशमंत्री डाक्टर एस जयशंकर हुंदे कन्नै मलाटी करडन। दौने नेता प्रमुख बहुपक्खी मुद्दे पर चर्चा करडन। बेयर बॉक राजघाट पर राष्ट्रपिता महात्मा गांधी होरें'गी बी श्रद्धांजलि भेंट करडन। ओह Electronics ते IT दे प्रतिनिधिएं कन्नै Artificial Intelligence दे संचालन ते विनियमन पर बी गल्ल करडन। बेयर बॉक कल संजा 2 दिन दे भारत दौरे पर नमीं दिल्ली पुज्जियां हियां।

<><><><><><>